

Txirrindularitza ♦ Kelmeko Javier Pascual da lider Valentzian

Pascual azkarrena

Pantani iheslariengandik 3:34ra iritsi zen

Xabier Usabiaga / Donostia

EZ da Laurent Jalabert neguan asko entrenatu den bakarra, atzo ikusi zenez. Valentziako lehen etapan haren pare beste zortzi ziklista izan ziren, eta nabarmendu zen une bakarrean beherantz egiten zuen errepideak, gorantzakoan gauza izan ez zenaren seinale. Ez zuen, gainera, frantziarrak beste garai batzuetako kemen mugagaberik erakutsi, hark mendian gora erritmoa estutu aurretik, Euskaltel-Euskadiko Alberto Martinezek, eta Kelmeko Tony Taulerrek lotsagabe erasoa joa baitzuten. Mugimendu horri esker bederatzi lagun bildu ziren aurrean, eta mendate gailurretik helmugara bitarteko 24 kilometroetan bederatziek egin lan koordinatuari esker (erreleboak itxuraz eman zituzten), 25 segundoko abantailaz ailegatzea lortu zuten, eta, okerrik ezean, itzulia euren artean jokatu da larunbateko erlojupean, bitartean ibilbideak ez baitu euren artean aldeak egiteko proportziorik eskaintzen. Aurreko taldetxoan Alberto Martinez eta Olano heldu ziren. Pantani 3:34ra sartu zen, eta Armstrong, berriz, 9:41era.

Sailkapenak

Lehen etapa eta nagusia

1. J Pascual (Kel)	4:17:18
2. L. Jalabert (ONCE)	d.b.
3. A. Tauler (Kel)	d.b.



MANUEL BRUQUE / EFE

Javier Pascual Llorentek Jalabert gainditu zuen esprintean.

Langabezitik garaipenera urtebete

JAVIER PASCUAL LLORENTEK (Alfaro, Errioxa, 28 urte) badu liburua idazteko motiborik. Interresgarria izango litzateke; latza eta samina, profesionaletako lehen esperientzia azaltzerakoan, baina gozosa eta zorionekoa gaur idatzi beharko balitz.

Baneston bost urte ibili eta gero, 1995ean pasatu zen profesionaletara, Santa Clara taldera. Bi urte egin zituen han, baina kobratu apenas bakarra,

arazo ekonomikoak gainezka ibili baitzen talde mistriotsu hura.

1997a hutsik egin zuen, ez profesionaletan, ez afizionatuetan, baizik eta kamioi batekin errepartoan. 1998an, atzera, profesionalatara itzuli zen Avianca-Telekom kolonbiako taldean. Kolonbiako itzuliko etapa bat erdietsi zuen, eta nahikoa izan zen iaz Kelmek fitxatzeko. Atzokoa du profesionaletako bigarren garaipena.

Arraunketa ♦ Urdaibai sendotu da

Mundakako mutil bi Urdaibain ariko dira

Ramon Basaldua / Bilbo

URDAIBAI ARRAUN TALDEAK koadrila sendoa osatuko du aurtengo traineru denboraldirako. Duela gutxi arte, Bermeo eta Elantxobeko arraun taldeetako arraunlariak ari ziren entrenatzen Urdaibai traineruan. Azken egunetan, berriz, Mundakako bi arraunlarik, iaz denboraldi osoan titular izandakoak, Urdaibaira etortzea erabaki dute. «Guretzat albiste pozgarria izan da Mundakako bi arraunlari Urdaibaira datozela jakitea. Proiektu honen xedea Bermeo, Mundaka eta Elantxobeko arraunlariak batzea da, eta zorionez, aurtengo hiru herrietako arraunlariak izango ditugu Urdaibain», adierazi zion EGUNKARIARI Patxi Bilbao Urdaibaiko entrenatzaileak.

«Urdaibaiko ateak zabal-zabalik daude»

Mundakako bi arraunlari Urdaibaira etorri izanak ez du esan nahi Mundakako Arraun Elkartek Urdaibai proiektuan sartzea erabaki duela. Izan ere, denboraldi hasieran Mundakak uko egin zion Urdaibain jarraitzeari. Guzak horrela, Mundakako senior mailako arraunlari batzuk utzi egin zuten arraunketa eta gainerakoek batela eta

trainerila prestatzen hasi ziren. Guzak ez dira oso ondo joan eta, azkenean, i

arraunlari guztiek arraunketa uztea erabaki dute. Mundakako bi arraunlarik Urdaibaira joatea erabaki dute bertan traineru denboraldia egiteko. Gainera, ez da baztertzen Urdaibaik trainerila batekin parte hartzea udaberriko denboraldian. Urdaibaiko arduradunek garbi utzi gura izan dute Mundakako gainerako arraunlariak zabalik dituztela Urdaibain ari direla. «Guk ez diogu atea itxi inori eta Mundakako arraunlariak garbi izan behar dute, euren nahi izanez gero, Urdaibaira etortzeko aukera dutela», adierazi dute Urdaibaiko arduradunek.

Mundakako arraunlariak Urdaibaira etortzeak sendotu egin du Patxi Bilbaoren koadrila. Guztira hogeita bost bat arraunlari ari dira lanean entrenatzailearen aginduetara denboraldi honetan.

Urdaibaik helburu handiak ditu aurtengo denboraldirako, are gehiago aurrekoan lortutako emaitza bikainak ikusita. Bermeok eutsi egin dio iazko koadrilari eta Elantxobeko arraunlari gehiago ari dira aurtengo Urdaibain. Hiru herrietako arraunlariak osatutako trainerua indartsua izango da benetan.

BBK bandera ez da Bermeon izango

BILBAO Bizkaia Kutzak urtero irailean antolatzen duen bandera Nerbioi ibaian jokatu da aurtengo. Bermeoko Arraun Elkartek BBK-ko ardura-dunengana jo zuen aurtengo bandera Bermeon joka dadin. Bermeotarrek bi arrazoi jarri dituzte mahai gainean eskaera egiteko: Bermeoko bandera irailaren 16an jokatzeko da urtero, eta aurtengo larunbata denez, BBK banderaren lehenengo jardunaldia egun berean jokatu beharko litzateke. Bestalde, Bermeoko Arraun Elkartek hogeitabost urte betetzen ditu aurtengo eta taldeko arduradunek egoki ikusi dute

BBK bandera Bermeon jokatzeko eskaera egitea.

Bilbao Bizkaia Kutzako arduradunek aintzat hartu zuten Bermeoren eskaera, baina Bizkaiko gainerako taldeen baimena lortzea jarri zuen baldintza. Joan zen astean bilera izan zen Bizkaiko Federazioaren egoitzan eta arraun talde gehienak BBK bandera Bermeon jokatzeari aurka azaldu ziren. Kostaldeko taldeak, Mundaka izan ezik, BBK bandera Bermeon jokatzeari alde agertu ziren.

Hala, bandera ohiko estropada eremuan jokatu delako jakinarazi dio aste honetan bertan BBK-k Bermeori.

esprintak

Hungariarentzat historiako lehen garaipena

Laszlo Bodrogi 23 urteko txirrindulari gaztea historian lasterketa profesional bat irabazten duen lehen hungariarra da, Argentina-ko Itzuliko atariko erlojupekoan nagusitu baita. Bodrogi bigarren izan zen Donostiako Munduko Txapelketan sub23 mailan eta beti Frantziako taldeetan ari da. Aurtengo profesionaletara jauzia egin du, Italiako Mapei taldearekin.

2000ko Festina Valentzian aurkeztu da

Festina taldeak, Juan Fernandezek zuzenduak, Valentziako itzulia hasi aurretik aurkeztu zuen 2000ko denboraldirako osatu duen taldea. Taldeak 25 txirrindulari ditu eta horien guztien artean bi dira euskaldunak: Joseba Beloki eta Iban Sastre. Taldearen helburua bizpahiru urteren buruan Tourreko garaipena lehitzeko moduan izatea da.

Baneston lesionatu asko

Aitor Garmendia ondo ibili arren, Banesto zailtasunez beteta dabil. Cesar Solauni ebakuntza egin diote barrabil batean; Marzio Bruseghin italiarra birus arraro baten jatorria atzeman ezinik dabil denbora askoan; Eladio Jimenez erori egin zen Andaluzian eta erradioa hautsia du; Leonardo Piepoli Valentzian dabil, baina hark ere osasun arazoak ditu.